

ILUARSISSUTIT

Siunnersuut 20. august 2015-imik ullulerneqartoq taarserpaat

Tunngavilersuut

2016-imi aningaasanut inatsisissatut siunnersuutip oqaloqatigiissutigineqarneranut atatillugu Naalakkersuisut aalajangerput neqit neqinillu nioqqutissiat akitsuutaannik qaffaanissaq siunnersuutiginiarnagu, aammalu sukuluut snusillu akitsuutaasa angissusii inatsisissatut siunnersuutaqqaartumut 20. august 2015-imeersumut sanilliullugit appartinniarlugit.

Taassuma kingunerisaanik allannguutit, matumani aamma isertitassatut naatsorsuutigineqartunik nalileeqqinneq oqaaseqaatini ilanngunneqarput.

Inatsisissatut siunnersuummut oqaaseqaatit

Oqaaseqaatit nalinginnaasut

1. Inatsisissatut siunnersuutip tunngavia

Siunnersuut isertitassatut sillimmasiussat, 2015-imi aningaasanut inatsisissamut ilanngullugit aalajangiunneqartut, aammalu 2016-imi ukiunilu aggersuni aningaasanut inatsisissanik oqimaaqatigiissitseqataasussat piviusunngortinneqarnissaannut ilaalluinnarpoq.

Isertitat aningaasartuutillu piffissami naalakkersuisuuffiusumi oqimaaqatigiinnissaat Naalakkersuisut pingaartitaraat. Inatsisissatut siunnersuut saqqummiunneqartoq oqimaaqatigiissitsinissap taassuma qulakkeerneqarnissaanut pingaaruteqarlunilu pisariaqartuuvoq.

Siunnersuutip siunertaraa sukulaatit aamma mamakujuttut sukkunit nioqqutissiat akitsuutaannik qaffaanissaq, aammalu landskarsip isertitaqarnerulernissaa qulakkeerumalugu qummoroortartut kiisalu snusit sukuluullu akitsuutaannik atuutilersitsinissaq.

Siunnersuut 19 mio. kr.-it missinginik isertitsissutaanerussangatinneqarpoq.

2. Inatsisissatut siunnersuutip imarisai

Sukkulaatit aamma mamakujuttut sukkunit nioqqutissiat eqqussorneqarneranni akitsuutip 100 procentimik qaffanneqarnissaa siunnersuutaavoq. Akitsuummik qaffaanerup kingunerisaanik atuinikinnerulernissaq, taamalu sukkunit nioqqutissianik nerisaqarpallaarnerup peqqissutsimut ajoqusiinnaasunik kingunerisinnaasaasa ikilinissaat naatsorsuutigineqarpoq.

Ilutigitillugu siunnersuutaavoq nioqqtissat akitsuusersorneqartut amerlillugit qummo-roortartut kiisalu sukuluut snusillu akitsuutaannik atuutilersitsisoqassasoq.

Qummoroortartut eqquorneqarneranni akitsuutip fakturami nalingisa 100 procentiannik angissusilerneqarnissaa siunnersuutaavoq, taavalu snusit sukuluullu akitsuutaasa fakturami nalingisa 300 procentiannik angissusilerneqarnissaat siunnersuutaalluni. Snusit sukuluullu akitsuutaasa angissusii tupanit tunisassiat allat akitsuusersugaanerannut naapertuuttumik angissusilerneqarput, qummoroortartut akitsuutaasa angissusii isertitaqarnissaq eqqarsaatigalu angissusiligaallutik.

Aammattaaq siunnersuutaavoq Inatsisartut inatsisaata Kalaallit Nunaanni pinerluttulerinermik inatsimmut aamma Kalaallit Nunaannut eqqartuussisarnermik inatsimmut innersuussineri ilu-arsiiffigineqassasut. Taakku eqqartuussisarnermik inatsit nutaaq aamma pinerluttulerinermik inatsit nutaaq 1. januar 2010-mi atortuulermata eqqoqqissaarunnaarput. Ilutigitillugu aalaja-ngerneqarpoq akiliisitsissutit pigisallu arsaarinnissutaasut Landskarsip pisassarissagai.

Inatsisissatut siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	§ 1 Nioqqtissanik eqquusuinermi akitsuutit pil-lugit Inatsisartut inatsisaanni nr. 19, 30. okto-ber 1992-imeersumi, Inatsisartut inatsisaatigut nr. 17, 22. november 2011-mi kingullermik allangortinneqartumi makku allannguuti-gitinneqarput:
Nr. 2. Sukkulaatit sukkulaatinillu nioqqtissiat sulluunniit (cacao pinnagit), lakridsit lakridsinillu nioqqtissiat sulluunniit, mar-cipanit marcipaninillu nioqqtissiat sulluunniit, karamelit, bonbonsit, sukku-aqqat assigisaallu, sukkullit sukkoqann-gitsullu kg.-mut 29 kr. 00 øre.	1. § 1, imm. 1, nr. 2-mi allassimasoq ”29 kr. 00 øre” allangortinneqarpoq ima: ”58 kr. 00 øre”.
Nr. 9. Tupat, a) tupat aggukkat, cut plug, tupat aseqqoris-sut assigisaallu, kiisalu tupat allat minner-	2. § 1, imm. 1, nr. 9, ima oqaasertaqassaaq:

<p>paamik 1,5 mm-imik silissusillit kg.-mut 280 kr. 01 øre b) allat kg.-mut 662 kr. 31 øre.</p>	<p>a) Tupat aggukkat, cut plug, tupat aseqqorisut assigisaallu kiisalu tupat pujullit allat minnerpaamik 1,5 mm-imik silissusillit kg.-mut 492 kr. 00 øre. b) Tupat pujullit allat kg.-mut 1.165 kr. 00 øre. c) Sukuluut aamma snusit fakturami nalingisa 300%-iat. d) Tupat pujoqangitsut allat. . . fakturami nalingisa 300%-it."</p>
	<p>3. § 1, imm. 1-imi normutut nutaatut ilanngunneqarpoq: "27. Qummoroortartut fakturami nalingisa 100%-iat."</p>
<p>§ 5. Inatsisartut inatsisaannik matuminnga imaluunniit Inatsisartut inatsisaat manna naapertorlugu aalajangersagaasunik unioq-qutitsisoqarpat unioqquutiseriaralu-artoqarpalluunniit, akiliisitsisoqarnera akiliisitsisoqanginneraluunniit apeqqutaatinnagu, iluanaarutit pigisallu Kalaallit Nunaanni pinerlunnermut inatsimmi kapitali 31 malillugu arsaarinnissutigineqarsinnaapput.</p>	<p>4. § 5 ima oqaasertaqassaaq: "§ 5. Inatsisartut inatsisaannik matuminnga imaluunniit Inatsisartut inatsisaat manna naapertorlugu aalajangersagaasunik unioqquutitsisoqarpat unioqquutiseriaralu-artoqarpalluunniit, akiliisitsisoqarnera akiliisitsisoqanginneraluunniit apeqqutaatinnagu, iluanaarutit pigisallu Kalaallit Nunaanni pinerluttulerinermik inatsimmi kapitali 37 malillugu arsaarinnissutigineqarsinnaapput. <i>Imm. 2.</i> Imm. 1 naapertorlugu arsaarinnissutit Landskarsimut pisassanngortinneqassapput, soorluttaaq akiliisitsissutit § 4 naapertorlugu angissusilerneqartut Landskarsip pisassarigai."</p>
<p>§ 8. <i>Imm. 3.</i> Kalaallit Nunaanni eqqartuussisarnermi inatsimmi kapitali 5-imi pineqaatissiissuteqarnissamut unnerluussuteqartarnermut aalajangersagaq imm. 1-imi nalunaaruteqartarnermut taaneqartumut tunngat-</p>	<p>5. § 8, imm. 3, ima oqaasertaqassaaq: "<i>Imm. 3.</i> Pineqaatissiissuteqarnissamut unnerluussuteqartarnermut aalajangersakkat Kalaallit Nunaannut eqqartuussisarnermik inatsimmi kapitali 38-miittut nalunaaruteqartarnermut imm. 1-imi taaneqartumut tunngatilugu atorineqarsinnaapput."</p>

tillugu atorpeqarsinnaavoq.	
	<p>§ 2</p> <p>Inatsisartut inatsisaat saqqummiunneqarnermini atortuulissaaq.</p>

3. Pisortanut aningaasatigut allaffissornikkullu sunniutissai

Siunnersuut 2016-imi ukiunilu missingersuusiorfiusuni 19 mio. kr.-it missinginik landskarsimut isertitsissutaanerunissaa eqqoriarneqarpoq.

Sukkunit nioqqutissiat 15 mio. kr.-it missinginik isertitsissutaanerussangatinneqarput, qummoortartunit 3 mio. kr.-it missingi aammalu sukuluunit snusinilla 600.000 kr.-it missingi isertitsissutaanerussangatinneqartut.

Siunnersuut pisortanut allaffissornikkut malunnaatilinnik sunniuteqassangatinneqanngilaq.

4. Inuussutissarsiutinik ingerlataqartunut aningaasatigut allaffissornikkullu sunniutissai

Nioqqutissanik pineqartunik eqqussuisartut nioqqutissat atuisunut pisisartunullu allanut tuniniaqqinneranni akiinik qaffaanissaat naatsorsuutigineqassaaq. Akit qaffakkiartornerisa kingunerisaanik nioqqutissat pineqartut isertitsissutaasarnersa appariaateqarnissaat naatsorsuutigineqarpoq.

Siunnersuut inuussutissarsiutinik ingerlataqartunut allaffissornikkut sunniuteqangaassangatinneqanngilaq.

5. Avatangiisinut, pinngortitamut inuillu peqqissusiannut sunniutissai

Tupat pujoqanngitsut kræfteqalissutaasinnaasunik, soorlu nitrosamininik akoqarput. Snusit sukuluullu akitsuutaannik atuutilersitsinerup atuinermik millisitsinissaa, taamaaqataanilla aamma tupanit tunisassiat pujoqanngitsut peqqinnissamut ajoqusiisarnerinik ikilisitsinissaa naatsorsuutigineqarpoq.

Aammattaaq qummoroortartut akitsuutaannik atuutilersitsinerup qummoroortartunik tunisaqartarnermik millisitsinissaa, taamaalillunilu pinngortitamut avatangiisinullu iluaqutaanissaa naatsorsuutigineqarpoq.

6. Innuttaasunut aningaasatigut allaffissornikkullu sunniutissai

Akitsuutit qaffaataasa nioqqutissat akii aqqutigalugit atuisunit akilerneqartussanngornissaat naatsorsuutigineqarsinnaammat akitsuutit nioqqutissanik pineqartunik atuisunit tamakkiisumik akilerneqartussanngornissaat naatsorsuutigineqarpoq.

Siunnersuut innuttaasunut allaffissornikkut sunniuteqassanngilaq.

7. Naalagaaffeqatigiinnermut Namminersorlutillu Oqartussanut tunngasut

Inatsisissatut siunnersuut naalagaaffeqatigiinnermut tunngasunik imaqqanngilaq.

8. Oqartussaasunik kattuffinnillu il.il. tusarniaaneq

Inatsisissatut siunnersuut piffissami 29. juli 2015-imiit 31. juli 2015-imut Inuussutissarsiornermut, Suliffeqarnermut Niuernermullu Naalackersuisoqarfimmut aamma Peqqissutsimut Naalackersuisoqarfimmut tusarniaassutigineqarpoq.

Tusarniaanermut akissuteqarnissamut piffissaliussap qaangiunnerani Inuussutissarsiornermut, Suliffeqarnermut Niuernermullu Naalackersuisoqarfimmit aamma Peqqissutsimut Naalackersuisoqarfimmit akissutisisoqarpoq.

Oqaaseqaatit tiguneqartut ataani nalinginnaasumik allanneqarput, Naalackersuisut akissutaat *uingasumik* allanneqartut.

Inuussutissarsiornermut, Suliffeqarnermut Niuernermullu Naalackersuisoqarfik nioqqutissanik eqqussuinermi akitsuutit pillugit Inatsisartut inatsisaata allanngortinneqarneranik siunnersuummut oqaaseqaatissaqanngilaq. Siunnersuut nersussuit aamma puulukit nujuitsut neqaannik nunatsinni agguillunilu suliareqqiilluni tunisassiulernissamik kinguneqassappat tamanna naalackersuisoqarfiup pitsaasuussangatippaa.

Naalackersuisoqarfiulli toqoraavimmut Neqimut Narsamiittumut innersuussinermut, aammalu nersussuit aamma puulukit nujuitsut ilivitsuutillugit affaatillugillu eqqunneqarneranni akitsuusigaanngissinnaanerannut tunngatillugu oqaatigaa, Neqip periarfissamik taassuminnga maannamut annertuumik atuisimanissaa Naalackersuisoqarfimmit ilisimaneqanngitsoq. Akerlianik Naalackersuisoqarfiup ilisimavaa Neqi kalaallit savaaraataannik pilersorneqarnerup

annikilliarterneratigut unammilligassaqaleriartortoq, taamaammallu neqit nunanit allaneersut kalaallit savaaraataasa neqaannik taarserneqarnissaat ajornartorsiutaasinnaasoq.

Naalackersuisut naatsorsuutigaat siunnersuut toqoraaviit neqaarniarfiillu nersussuit puulukillu nujuitsut neqaannik agguisarnissaannut suliareqqiisarnissaannullu pilerinarsaataasasoq, nersussuimmi puulukillu nujuitsut ilivitsuutillugit affaatillugillu eqqussorneranni akitsuummik akiliinnginnissamut periarfissaq atuutitiinnarneqartussaammat, taassumalu ilutigisaanik neqit aggoriikkat eqqussorneqartut akisunerulersussaammata.

Naalackersuisoqarfiutaaq kissaatigaa siunnersuutip aningaasatigut sunniutissai pillugit imnikkoortumi allassimasariaqartoq, pingaartumik neqit akitsuutaannik qaffaaneq aningaasarsiakitsunut inoqutiginnullu aningaasarsiamik ilaannik ileqqaarnissamut periarfissaqanngitsunut aningaasatigut nammackersuinerussasoq.

Akitsuutinik qaffaanerit pisiassat akii aqqutigalugit nioqqutissanik pineqartunik atuisartunit akilerneqarnissaat Naalackersuisut naatsorsuutigaat. Naalackersuisulli naatsorsuutigaat atuisartut neqinik eqqussorneqartunik atuinermik ilaa kalaallit tunisassiaannik atuinerulerner-mikkut taarsissagaat. Ilutigitillugu naatsorsuutaavoq toqoraaviit neqaarniarfiillu nersussuar-nik puulukinillu nujuitsunik eqqussorneqartunik agguisarnermik suliareqqiisarnermillu aal-lutaqarnerusalissasut, nersussuimmi puulukillu nujuitsut ilivitsuutillugit affaatillugillu eqqussorneranni akitsuummik akiliinnginnissamut periarfissaq atuutitiinnarneqartussaam-mat.

Peqqissutsimut Naalackersuisoqarfik snusit/sukuluut kiisalu sukkut akitsuutaannut tunngatil-lugu oqaaseqaatissaqanngilaq.

Akerlianilli Peqqissutsimut Naalackersuisoqarfiup isumakulunnartoqartippaa neqit eqqussorneqartut akitsuutaasa qaffanneqarnerat inuit peqqissusiannut sunniuteqarnerlussinnaasoq, neqimmi tunisassianik orsoqarnerullutillu tarajoqarnerusunik akikinnerusunik taarserneqarsinnaammata. Orsup akitsuuserneqarsinnaanerata periarfissatut allatut eqqarsaatigineqarnissaa Peqqissutsimut Naalackersuisoqarfiup inassutigaa.

Orsoq akitsuusersorneqalissappat tamanna teknikkikkut sulinikkullu annertuunik unammil-ligassaqarfiussasoq naatsorsuutigineqarsinnaavoq. Neqit eqqussorneqartut akitsuutaasa si-unnersuutigineqartut, inatsisissatut siunnersuutip saqqummiunneqarneraniit atuutilersumik tamanna tunngavigalugu taarserneqarnissaat piviusorsior-tuusorinannilaq.

Tassungattaaq ilutigitillugu Naalackersuisut naatsorsuutigaat atuisartut neqinit nioqqutissianik avataaneersunik atuinermik ilaa kalaallit tunisassiaannik, nalinginnaasumik peqqinnarnerusutut isigineqartunik atuinissamik taarsissagaat.

Inuussutissarsiornermut, Suliffeqarnermut Niuernermullu Naalackersuisoqarfimmut akissut aamma innersuussutigineqarpoq.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut (§ 1, imm. 1, nr. 2)

Sukkulaatit sukkulaatinillu nioqqutissiat sukkullit, mamakujuttut il.il. eqqussuinermi akitsuutit pillugit inatsimmi § 1, imm. 1, nr. 2 naapertorlugu akitsuusigassaapput. Akitsuut oqimaassuseq malillugu akitsuutaavoq, kiilumullu akitsuut 29,00 kr.-iulluni. Akitsuut 1992-imili allangortinneqarsimanngilaq.

Siunnersuutaavoq sukkulaatit sukkulaatinillu nioqqutissiat sulluunniit (cacao pinnagit), lakridsit lakridsinillu nioqqutissiat sulluunniit, marcipanit marcipaninillu nioqqutissiat sulluunniit, karamelit, bonbonsit, sukkuvaqqat assigisaallu, sukkullit sukkoqanngitsullu akitsuutaat kiilumut 29,00 kr.-iusoq 100 procentimik qaffallugu kiilumut 58,00 kr.-inngortinneqassasoq.

Nr. 2-mut (§ 1, imm. 1, nr. 9)

Tupat pujortagassallu allat (sikaat, sikaavaqqat, cigarillosit, sikaritsit, tupat sikaritsinullu imusivissat il.il.) eqqussuinermi akitsuutit pillugit inatsimmi § 1, imm. 1, nr. 7-10 naapertorlugit akitsuusigassaapput.

Siunnersuutaavoq sukuluut aamma snusit, tupanit nioqqutissiatut allatuulli eqqussuinermi akitsuuserneqartalissasut. Sukuluut tassaapput tupat imusat, silittut, amitsut, kipparissut imaluunniit naqitat pujortagassaanatik tamuasassatut immikkut suliaasut, niuertarfinnilu tuniagassatut poortugaasut. Snusit tassaapput tupat pujoralaat imaluunniit tupat immikkut suliaasut pujortagassaanatik najuussugassat. Snusit aamma puussiaaqqanut qanermut ilisassatut suliaasunut poortorlugit tuniniarneqarsinnaapput.

Sukuluutut snusitulluunniit aamma isigineqarput nioqqutissat tupaannaanngitsunik akullit, aammalu sukuluut snusillu suunerinik siuliini nassuiarneqartutut ittut.

Aamma tupat pujoqanngitsut allat akitsuusigassaanissaat siunnersuutaavoq. Tupat pujoqanngitsut allat tassaapput tapanut taarsiullugit suliaasut, soorlu pujortagassatut akuukkat tapanik imaqqanngitsut. Tupat isseri, tupanit qajuusaasiat kiisalu pujortagassat allat, soorlu ”vandpibebnut tupassat”, tapanut taarsiutaannarnik tupaannngitsunillu allanik imallit.

Isserit il.il. tupanut pujoqanngitsunut, soorlu sikaritsinut elektroniskiusunut immiussat, tupanik pujortarfiusinnaanngitsut, najuussuiffiusinnaanngitsut tamuaneqarsinnaanngitsut allatulluunniit iineqarsinnaanatilluunniit kukunneqarsinnaanngitsut akitsuusigassanut ilanngillat.

Akitsuut fakturami nalingisa 300 procentiannik angissusilerneqarpoq, tassa tupanit nioqquutisiat allat akitsuusersugaanerannut naapertuutikannersumik.

Nr. 3-mut (§ 1, imm. 1, nr. 27)

Qummoroortartut eqquorneqarneranni akitsuummik atuutilersitsinissaq siunnersuutaavoq.

Qummoroortartut matumani pineqartut taamaallaat tassaapput qummoroortartut nuannaarnitutit atugassiat, Qummoroortatinik toqqortaqaartarneq pillugu Namminersornerullutik Oqartussat nalunaarutaanni nr. 19, 9. december 2004-meersumi § 2-mi nassuiarneqartut.

Akitsuut nalingat malillugu akitsuutitut fakturami nalingisa 100 procentiannut angissusilerneqarpoq.

Nr. 4-mut (§ 5)

Inatsisartut inatsisaanni attuuttumi § 5 Kalaallit Nunaanni pinerluttulerinermik inatsimmi kapitali 31-mut innersuussinermik imaqarpoq. Pinerluttulerinermik inatsisip nutaap 1. januar 2010-mi atortulerneratigut innersuussineq taanna eqqoqqissaarunnaarpoq. Arsaarinnittarneq pillugu aalajangersakkat Kalaallit Nunaanni pinerluttulerinermik inatsimmi nutaami kapitali 37-miipput. Taamaammat innersuussuttip iluarsineqarnissaa siunnersuutaavoq. Taassuma saniatigut siunnersuutaavoq akiliisitsissutit pigisallu arsaarinnissutigineqartut Landskarsip pisarsarissagai.

Nr. 5-imut (§ 8, imm. 3)

Inatsisartut inatsisaanni attuuttumi § 8, imm. 3 Kalaallit Nunaannut eqqartuussisarnermik inatsimmi kapitali 5-imut innersuussinermik imaqarpoq. Eqqartuussisarnermik inatsisip nutaap 1. januar 2010-mi atortuulerneratigut innersuussineq taanna eqqoqqissaarunnarpoq. Pineqaatissiisoqarnissaanik unnerluussisarneq pillugu aalajangersakkat Kalaallit Nunaannut eqqartuussisarnermik inatsimmi nutaami kapitali 38-miipput. Taamaammat innersuussuttip iluarsineqarnissaa siunnersuutaavoq.

§ 2-mut

Inatsisartut inatsisaata saqqummiunneqarnermini atortuulernissaa siunnersuutigineqarpoq. Tamanna akitsuutunik qaffaaneq pissutigalugu nioqqutissanik pineqartunik eqqussuipallattoqarsinnaaneramik pinngitsoortitsiniarnermik pissuteqarpoq.